

# "Nakusihi, Unioneshe Utukufu Wako"



## SABATO MCHANA

**Somo la Juma Hili:** *Kut. 33:7-34:35; Kum. 18:15, 18; Yn. 17:3; Rum. 2:4; Yn. 3:16; 2 Kor. 3:18.*

**Fungu La Kukariri:** "Bwana akapita mbele yake, akatangaza, Bwana, Bwana, Mungu mwingi wa huruma, mwenye fadhili, si mwepesi wa hasira, mwingi wa rehema na kweli; mwenye kuwaonea huruma watu elfu elfu, mwenye kusamehe uovu na makosa na dhambi; wala si mwenye kumhesabia mtu mwovu kuwa hana hatia kamwe; mwenye kuwapatiliza watoto uovu wa baba zao, na wana wa wana wao pia, hata kizazi cha tatu na cha nne" (*Kutoka 34:6, 7*).

**S**ote tunahitaji kukua katika kutembea kwetu na Mungu. Bila ukuaji, tumekufa. Mtume Petro anatamka: "Lakini, kueni katika neema, na katika kumjua Bwana wetu na Mwokozi Yesu Kristo. Utukufu una yeye sasa na hata milele! Amina" (*2 Pet. 3:11*). Tunapaswa kuwa tayari kukua. Kila siku tu katika chuo kikuu cha Mungu, ambapo hakuna kuhitimu lakini kuna mchakato wa kujifunza wa daima. Katika kila hatua ya ukuaji, unaweza kuwa mkamilifu ikiwa unamruhusu Mungu akufinyange kuwa mtu anayekuita kuwa, katika Kristo.

Fikiria juu ya shule. Wanafunzi wa darasa la kwanza wakijifunza kusoma na kuhesabu hadi 100, wanapata alama ya ufaulu kwa sababu maarifa yao yamekamiliika katika hatua hiyo na kiwango cha ukuaji. Lakini, ikiwa kiwango hiki cha maarifa, na sio zaidi, kitagunduliwa kwa mwanafunzi wa shule ya sekondari, itaonesha kushindwa sana katika elimu yake. Ni sawa na ukuaji wetu katika neema na maarifa ya Mungu. Katika kila hatua ya ukuaji wetu, tunaweza kuwa wakamilifu katika mazingira yetu kama vile Kristo alivyokuwa katika Yake.

Juma hili tunajifunza jinsi Musa, kwa kujua na kufuata maagizo ya Mungu, alivyokuwa anakua katika kutembea kwake na Bwana.

*\*Jifunze somo la juma hili kwa maandalizi ya Sabato ya Septemba 20.*

## Hema ya Kukutania

**Soma** Kutoka 33:7–11. Kwa nini Mungu alimtaka Musa ajenge hema ya kukutania?

Hatupaswi kuchanganya “hema ya kukutania” (iliyojengwa nje ya kambi ya Israeli) na hema takatifu, ambayo baadaye ilijengwa na kuwekwa katikati ya kambi. Hatujui ni mara ngapi Musa alikutana na Mungu katika hema ya kukutania. Hata hivyo, jambo moja tunajua kwa hakika: Kukutana kwa Musa na Mungu kulileta urafiki wa karibu kati yao. “Naye Bwana akasema na Musa uso kwa uso, kama vile mtu asemavyo na rafiki yake” (*Kut. 33:11*). Rafiki ni mtu tunayeweza kushauriana na kujadili kwa uwazi kila kitu naye na kuamini kwamba kamwe hatafunua kwa wengine. Rafiki ni mojawapo ya vitu vizuri kuwa navyo na namna moja njema kabisa ya mtu kuwa.

Kama ilivyoandikwa katika Kutoka 19–34, kisa cha Musa kinafundisha sana jinsi Mungu anavyoyabadilisha maisha yetu. Mungu alijengaje uhusiano na kiongozi huyo hodari? Uchunguzi wa maisha ya Musa unaonesha jinsi alivyokua katika ujuzi wake, si tu wa uweza wa Mungu bali upendo na tabia Yake. Hii ni sehemu muhimu ya kuwa na uhusiano na Mungu.

Kabla ya kufika katika Mlima Sinai, Musa alitumiwa na Mungu kwa kiasi kikubwa sana huku akiandaliwa kwa ajili ya jukumu maalum la uongozi. Katika nchi ya Midiani, wakati akichunga kondoo, Mungu alimvuvia kuandika vitabu viwili: Ayubu na Mwanzo. Kisha, katika tukio la kuvutia la kichaka kilichowaka moto, alitwa na Mungu kuwaongoza Waisraeli kutoka Misri. Aliona kushindwa kwa miungu ya Wamisri na jeshi kubwa la Wamisri katika Bahari ya Shamu. Aliona kwa majuma mengi jinsi Mungu aliyowaongoza Israeli kutoka Misri hadi Sinai. Baada ya uzoefu huu kufanya uso wake kung’aa, aliwaongoza Israeli kwa miaka mingine 39, hadi karibu kabisa na Nchi ya Ahadi. Ujumbe wa Biblia unasema kwamba Musa alikuwa mtumishi mwaminifu wa Mungu (*Kum. 34:5, Yos. 1:1*), nuru isiyoharibiwa na giza, nabii kielelezo ambaye kwa yeye wengine wangepimwa (*Kum. 18:15, 18*) Alikuwa wakala wa mabadiliko, ingawa si kila wakati watu walifuata maagizo na maneno yake. Walipofanya hivyo, walistawi.

Tunaweza kujifunza kutoka kwa Musa kwa sababu kisa cha pekee cha maisha yake kinatueleza kile Mungu anachoweza kufanya tunapomruhusu atubadilishe. Ni vipindi gani vilikuwa muhimu katika kutembea kwako na Mungu, ambapo ulitambua jinsi alivyotenda kazi kwa nguvu maishani mwako?



## Nipate Kukujua

**Soma** Kutoka 33:12–17. Musa alimuomba Bwana amfundishe nini? Kwa nini alidai Mungu aende pamoja nao ili kuwaongoza?

Ukuaji wa Musa katika Bwana ulikuwa thabiti. Alisogea karibu na Bwana zaidi na kutafuta kufuata mfano wa Mungu. Siku moja alipokuwa akiongea na Mungu katika hema ya kukutania, ghafla Musa alitambua kwamba hakumjua, naye akaomba ombi maalum: “‘Unionyeshe njia zako, nipate kukujua’” (*Kut. 33:13*). Musa alijua hitaji lake la kina la kumwelewa Mungu kwa kiwango kipya. Aligundua kwamba kadiri alivyomjua Bwana zaidi, ndivyo alivyogundua zaidi jinsi asivyomjua. Alitambua hitaji lake naye akatamani kumjua zaidi kwa moyo wote. Kwa hiari Mungu alikubali ombi la Musa.

Kwa kutazama uzoefu wa Musa hadi sasa, tunaweza kuona jinsi Musa alivyovutwa katika uhusiano wa kina zaidi na wa karibu na Bwana na jinsi alivyokua kiroho.

Kwanza, Musa alikwea mlimani na “kupanda kwa Mungu” (*Kut. 19:3*). Kisha akapanda “juu ya mlima” (*Kut. 19:20*) na baadaye akakaribia lile wingu, “giza kuu” Mungu alipokuwako (*Kut. 20:21*).

Katika tukio lingine, “Musa aliingia ndani ya lile wingu” Mungu alipokuwapo, naye akakaa na Bwana siku 40 mchana na usiku (*Kut. 24:18*). Katika siku hizi 40, Mungu alimpa Musa zawadi mbili za thamani: (1) zawadi ya Amri Kumi zilizoandikwa na Mungu Mwenyewe katika mbao mbili, pia zilizochongwa na Yeye (*Kut. 24:12*), na (2) maelekezo ya jinsi ya kujenga na kuweka samani za hema takatifu (*tazama Kut. 25–31*).

Kisha alitumia siku zingine 40 mchana na usiku pamoja na Bwana, akiwaombea wenye dhambi (*Kut. 32:30–32, Kum. 9:18*).

Hata hivyo, hata baada ya haya yote, Musa alitamani kujua tabia ya Mungu kwa uthabiti zaidi, na punde Mungu alimpa ufahamu maalum ili kuelewa Yeye ni nani. Ujuzi huu Musa alioutamani haukuwa ufahamu tu wa kiakili juu ya Mungu bali ujuzi wa uzoefu wa nafsi Yake.

Si ajabu karne nyingi baadaye Yesu alisema: “‘Na uzima wa milele ndio huu, wakujue wewe, Mungu wa pekee wa kweli, na Yesu Kristo uliyemtuma’” (*Yn. 17:3*). Ni njia gani iliyo bora zaidi kwa Mungu kujitambulisha kwa wanadamu kuliko kuwa mwanadamu Yeye Mwenyewe?

**Je, unamjua Mungu, au unafahamu tu habari Zake? Kuna tofauti gani muhimu kati ya hayo mawili?**

## “Nakusihi, Unioneshe Utukufu Wako”

Baada ya uasi wa ndama wa dhahabu, Musa aliwaombea watu wa Mungu na alitaka kuhakikishiwa kwamba Bwana angeendelea kuwaongoza mpaka Nchi ya Ahadi. Ndani kabisa ya nafsi yake, alitaka pia kumjua Bwana vizuri zaidi.

**Soma** Kutoka 33:18–23. Mungu alijibuje ombi la Musa la kutaka kuuona utukufu Wake?

“Nakusihi, unioneshe utukufu wako,” Musa alimwomba Bwana. Kwa rehema Zake, Bwana alidhihirisha utukufu Wake kwake. Hata hivyo, alipojibu ombi la Musa, Mungu aliahidi kumwonesha “wema” Wake. Mtu anaweza kuhitimisha kwa usalama kwamba utukufu wa Mungu ni wema Wake, yaani, tabia Yake (*tazama pia Ellen G. White, Matendo ya Mitume, Sehemu ya Pili, uk. 241; Christ’s Object Lessons, uk. 414, 415; Manabii na Wafalme, Sehemu ya Kwanza, uk. 270*).

“Ni utukufu wa Mungu kuwapatia watoto wake wema Wake. Anashauku kuwaona wanaume na wanawake wakifikia viwango vya juu.”—Ellen G. White, *Matendo ya Mitume, Sehemu ya Pili, uk. 202*. Utukufu Wake ni kuwapokea wenye dhambi wanaotubu (*tazama Manabii na Wafalme, Sehemu ya Pili, uk. 261*) na kutoa kila kitu kinachohitajika ili kuwabadilisha. Wakati huo huo, ni “utukufu” wetu kufunua tabia Yake katika maisha yetu na kuifanya ijulikane kwa wengine.

Huku kuakisi tabia ya Mungu, wema Wake, fadhili, na upendo mwema, lazima kuonekane katika matendo yetu. Kwa njia hii, tuna nafasi ya kuwa sio tu baraka kwa ulimwengu bali nuru ing’ayo kwa ulimwengu unaotazama. Kama vile Paulo asemavyo: “Maana nadhani ya kuwa Mungu ametutoa sisi mitume mwisho, kama watu waliohukumiwa wauawe; kwa sababu tumekuwa tamasha kwa dunia; kwa malaika na wanadamu” (*1Kor. 4:9*). Mawanda haya ya ulimwengu mzima yanayapatia maisha na huduma yetu maana na kusudi ambalo hatuwezi kulielewa.

Katika Warumi 2:4, Paulo anasema kwamba “wema wa Mungu wakuvuta upate kutubu.” Yaani, ni wema na tabia ya Mungu inayodhihirishwa/inayoelekezwa na Roho Mtakatifu ndiyo inawasadikisha watu juu ya dhambi zao na hitaji la wokovu. Kwa hakika, tunapoutazama msalaba na kujua aliyekuwa pale (Bwana Mwenyewe) na kwa nini alikuwa pale—kwa sababu alitupenda na hii ndiyo ilikuwa njia pekee ya kutuokoa—tuna ufunuo mkubwa zaidi kabisa wa wema na tabia Yake.

**Unatumia muda kiasi gani kutafakari Msalaba na kile unachokwambia kuhusu tabia ya Mungu?**



## Ufunuo Binafsi wa Mungu

**Soma** Kutoka 34:1–28. Mungu aliufunua je utukufu Wake kwa Musa?

Musa alipaswa kwenda na mbao mbili za mawe kama zile za kwanza, alizozivunja (*Kut. 32:19*). Alikuwa anaenda kukutana na Bwana juu ya Mlima Sinai kwa mara ya saba. Kupanda kwake hapo awali kunatajwa katika maandiko yafuatayo: (1) *Kut. 19:3, 7*; (2) *Kut. 19:8, 14*; (3) *Kut. 19:20, 25*; (4) *Kut. 20:21*, *Kut. 24:3*; (5) *Kut. 24:9, 12–18*; *Kut. 32:15*; (6) *Kut. 32:30, 31*. Musa alianza kupanda kwake asubuhi na mapema.

Musa sasa alikuwa tayari kwa ajili ya utambuzi huu adhimu wa tabia ya Mungu. Uzuri wa tabia ya Mungu unaelezewa vizuri zaidi katika ufunuo huu binafsi ulio mzuri mno Wake Yeye Mwenyewe. Ni maelezo muhimu zaidi ya Mungu ni nani; ni uzi wa dhahabu uliofumwa katika Biblia nzima (*Hes. 14:18*, *Neh. 9:17*, *Zab. 103:8*, *Yoeli 2:13*, *Yon. 4:2*). Tangazo la Bwana hapa ni Yohana 3:16 ya Agano la Jipya. Katika maeneo muhimu sana, waandishi wa Biblia wanatumia, kurudia, au kufafanua huku kujitangaza binafsi kwa Mungu aliye hai, kwa sababu tabia ya Mungu ni lazima ieleweke kwa usahihi.

Musa alipopokea maelezo bora sana, ya pekee, na yasiyo na kifani ya jina la Mungu, alisujudu na kumwabudu Bwana. Tunapoona mara moja upendo, neema, fadhili, huruma, wema, uaminifu, msamaha, utakatifu na haki ya Mungu, sisi pia tunavutwa Kwake. Ni wakati tunapoona na kuvutiwa na sifa Zake bora sana ndipo tunaanza kumpenda, upendo unaoleta shauku ya kumtumikia na kumtii. Kwa sababu anatupenda, tunampenda pia (*1 Yn. 4:19*).

Katika ufunuo huu binafsi, Mungu anamhakikishia Musa kwamba angewatendea mambo ya ajabu watu Wake na kuwaongoza kuingia katika Nchi ya Ahadi. Anafanya upya agano pamoja nao, akiahidi kwamba mataifa mengine yataona ukuu Wake na kazi Yake ya kustaajibisha. “Tazama, nafanya agano; mbele ya watu wangu wote nitatenda miujiza, ya namna isiyotendeka katika dunia yote, wala katika taifa lo lote; na watu wote ambao unakaa kati yao wataona kazi ya Bwana, kwa maana ni neno la kutisha nikutendalo” (*Kut. 34:10*).

Hata hivyo, Waisraeli walipaswa kumtii Mungu na kufuata masharti kumi ya wazi ili kupata ustawi wao. Kisha Mungu alimtaka Musa aandike maudhui ya agano hilo, ambalo lilikuwa tayari limevunjwa (*Kut. 34:27, 28*).

## Uso wa Musa Unaong'aa

**Soma** Kutoka 34:29–35. Ni nini kilikuwa chanzo cha kung'aa kwa uso Musa?

Baada ya Mungu kudhihirisha tabia Yake ya upendo kwa Musa, Musa alishuka katika kambi ya Israeli akiwa na uso unaong'aa. Je, Musa alijua mwanzoni kwamba uso wake ulikuwa unang'aa? Sivyo kabisa. Kadiri mtu anavyokuwa karibu na Bwana zaidi, ndivyo mtu huyo anavyotambua zaidi kutokamilika kwake ikilinganishwa na utakatifu wa Mungu.

Nini kilikuwa chanzo cha mabadiliko ya Musa yaliyosababisha uso wake kung'aa? Sababu haikuwa katika ukweli sahihi kwamba alikuwa katika kuwepo kwa Mungu, kwa sababu mara kadhaa hapo awali alikuwa na Bwana na uso wake haukung'aa baada ya huko kukutana. Hata hivyo, kama asingekuwa katika kuwepo kwa Bwana, uso wake using'aa kamwe. Ni wakati tu alipoelewa wema na fadhili za Mungu, na kuwa wazi kabisa kwa Mungu kwa sababu ya uzuri wa tabia Yake, ndipo Musa alipobadilishwa, na uso wake ukang'aa. Mioyo na akili zetu vinaweza kupata mabadiliko tunapojisalimisha kwa Mungu na kumruhusu kuwa Bwana na Mfalme wa maisha yetu.

**Soma** 2 Wakorintho 3:18. Yesu anawezaje kukubadilisha hatua kwa hatua ili kufanana Naye?

Paulo analinganisha uso wa Musa unaog'aa na wa Yesu Kristo na kwamba utukufu wa Yesu (ambaye alikuwa mfano wa sheria na neema ya Mungu) unazidi utukufu wa torati pamoja na Musa. Kristo, pamoja na sheria Yake, anaweza kukaa katika tabia zetu pale tu tunapomtazama Yesu (*Ebr. 3:1, Ebr. 12:2*) na kwa uweza wa Roho wa Mungu tu (*2 Kor. 3:12-18*).

Musa ni kielelezo kwetu, akidhihirisha kile Mungu anachoweza kutufanyia tunapomruhusu abadili tabia zetu na kutufinyanga tufanane na sura Yake ya kiungu. Hiki ndicho anachomaanisha Paulo anapozungumzia kutembea katika “upya wa uzima” (*Rum. 6:4*).

Ni maeneo gani ya tabia yako yanahitaji kuakisi tabia ya Mungu vizuri zaidi? Yumkini kila eneo, sawa? Hata hivyo, ni kwa namna gani kukaza fikra katika Msalaba, na kile unachomaanisha, kunaweza kukutia shime na kukuhakikishia wokovu?



**Jifunze Zaidi:** Soma kwa makini Ellen G. White, "Ibada ya Sanamu Katika Sinai," uk. 326–342, katika *Wazee na Manabii, Sehemu ya Kwanza*.

Katika siku yenye huzuni, baba na mwana walitembelea kanisa kuu. Walipotazama madirisha ya vioo vilivyotiwa rangi yenye picha maridadi ya matukio mbalimbali ya Biblia, ghafla jua lilianza kuangaza kupitia kioo cha picha ya watu, likiwaangazia nuru yenye kuvutia. Mvulana huyo mdogo alimwuliza baba yake: "Baba, watu hawa ni akina nani?" Baba hakujua mengi kuhusu Ukristo, Kristo, au wanafunzi Wake lakini alijibu upesi: "Watu hawa ni Wakristo." Picha hii inayong'aa ilidumu akilini mwa mwana huyo. Siku moja mwalimu wa mvulana huyo aliuliza darasani: "Watoto, je, mnajua Wakristo ni akina nani?" Mvulana huyo mdogo alikumbuka picha angavu katika kanisa kuu na kujibu: "Najua, Wakristo ni watu wanaong'aa." Sambamba na hilo, Yesu aliwaambia wafuasi Wake, "Vivyo hivyo nuru yenu na iangaze mbele ya watu, wapate kuyaona matendo yenu mema, wamtukuze Baba yenu aliye mbinguni" (*Mt. 5:16*). Watu wanaong'aa tu ndio wanaweza kuwa mawakala wa mabadiliko.

## **Maswali ya Kujadili:**

- ① "Kama tungejinyenyesha mbele za Mungu, na kuwa wema, wenye adabu na wapole na wenye huruma, kungekuwa na waongofu mia moja katika ukweli ambapo sasa kuna mwongofu mmoja tu."—Ellen G. White, *Testimonies for the Church*, vol. 9, uk. 189. Kuna ujumbe gani wenye nguvu hapa kwa ajili yetu sote kuhusu jinsi tabia zetu, matendo yetu, na mitazamo yetu vinavyoweza kuathiri ushuhudiaji wetu?
- ② Kutoka 34:6, 7 inaitwa kwa usahihi Yohana 3:16 ya Agano la Kale. Kwa nini?
- ③ Unawezaje kueleza uzuri wa tabia ya Mungu, kutokana na ufunuo binafsi wa Mungu katika Kutoka 34:6, 7, kwa watu wanaouliza Mungu wako ni nani?
- ④ Darasani, waruhusu watu wajadili jinsi tabia na matendo ya watu wanaomkiri Kristo vinavyoathiri mwenendo wao. Yaani, mvuto wa wale ambao walikuwa wema, wenye fadhili, wanyenyekevu, na wenye kusamehe umekuwaje kwa uzoefu wako mwenyewe? Wakati huo huo, ni kwa namna gani "Wakristo" wasio wema, wasiosamehe, na wenye kiburi wameathiri kutembea kwako na Bwana?